

無上祕要卷之十九

叔九

無上祕要卷之十九

九

天帝衆真儀駕品

衆真儀駕

行玉清之道出則諸天侍軒給玉童玉女各  
三千人建三七色節駕紫雲飛輶十二瓊輪

前導鳳歌後從天鈞六師啓路飛龍翼轅位  
唯高仙列圖玉清

行上清之道出則五帝侍衛給玉童玉女各  
一千五百人建紫毛之節駕飛雲丹輿前吹  
鳳鳴後奏天鈞玄龍啟道五帝參軒位唯上

清左右公卿

行太清之道出則五帝侍衛給玉童玉女各  
八百人建五色之節駕龍輿飛煙前嘯九鳳  
後吹八鸞白虬啓道太極參軒

右出洞真八素經

叔九

真皇所乘三素之輿左御絳鸞右轡靈鳥  
中央黃老君駕鬱華飛龍乘三素之雲

右出洞真九真中經

元始天王與改生共乘碧霞九靈流景雲輿  
上登太空瓊臺騫靈紫殿黃華英房

右出洞真變化七十四方經

元始天王與太帝君共乘碧霞流颯紫輦上  
登九玄之崖无色之端徘徊洞天逍遙无極  
流眄縱體適意浮輪

右出洞真太極金書上經

上清九天玄神八聖遊於空雲足超靈堂景  
浮氣澄大宴太玄玉帝戲參九鳳龍車玉輿  
乘九色飛雲從十二龍駕仙官玉女各二十  
四人又八鸞白鵠九鳳齊鳴飛雲陳九色  
之節十絕華幡三天寶蓋九天乘騎飛遊虛

空逕造五嶽名山

右出洞真龜山元籙經

高聖太上大道君乘碧霞九靈八景流雲之  
輿從飛仙羽蓋桑林千真紫虛之童三十萬  
人顯蓋九霞迴天傾光天下丁前驅六師屬天  
奔雷揚精四明扶輪九靈啓路五老通津飛  
旂瓊塗流眇高清上詣九層七映朱宮

叔九

二

右出洞真靈書紫文上經

元陽元皇玉帝君時乘碧霞九鳳飛舉瓊輪  
羽蓋從桑林千真萬乘億騎飛行

九天丈人時乘飛鳳玄龍遊於白水涉明空  
山之上

右出洞真青要紫書金根經

青精君常乘羽逸之車携玄景之童登紫空  
之山

玉華三元君乘神回之車登雲飆之宮入流  
逸之房

太極元君乘凌羽之車上宴上清執震靈之  
符名萬魔之王

九氣丈人時乘晨回之風登蕩滯神山

八皇老人時乘廣琅之車把鳳羽之節登華  
便之山入大老之室

青童君乘玉雕之軒御圓珠之氣登雲波之  
山入東華之室

九老仙皇太帝君乘合羽之車上登扶桑之

叔九

三

杪會九老之京萬仙受事

萬華先生時乘三素之景羽明之軒北登高  
元之嶽宴寢萬華之室

司禁真伯上帝王君時乘日月之軒上登重

漢之山入宴羽景之堂濯纓帝川之池會仙

絕空之宮

右出洞真大洞玉經

上聖太上大道君高上玉帝十方至真並乘  
五色瓊輪琅舉碧輦九色玄龍十絕羽蓋三  
素流雲

諸天大聖妙行真人皆乘碧霞九靈流景飛  
雲玉輿神霞煥爛流眇太元五帝神仙桑林  
千真玉真嘯命十方天衆上詣  
上清紫微上宮建天寶羽服詣

元始天尊金闕之下請受元始靈寶赤書五



篇真文

右出洞玄赤書經

太上大道君以上皇元年九月十日西遊玉  
國龍岷山中與太真真王夫人共座一岵華  
林之下時有

元始天尊忽乘碧霞綠輿二素飛雲神仙羽  
蓋三十二天上帝玉真飛仙玉女十億萬人  
建九色之節十絕靈幡散華燒香浮空而來  
前導鳳歌後從天鈞獅子白鶴嘯歌邕邕五  
老啓途太極叅軒衆真並降於龍岷山中

右出洞真金錄簡文真一經

上皇元年九月二日後聖李君出遊西河歷  
觀八方值元始天王乘八景玉輿駕九色玄  
龍三素飛雲導從群仙手把華幡浮空而來  
同會西河之上

卷九

右出洞玄二十四生圖

三十六土皇儀駕

第一壘四音土皇常以立春之日乘青龍之  
車執青色之麾從青帝胡老之官巨獸之騎  
九千人上詣鬱單无量天奏地仙得道上學

之人言名於四天之王

第二壘四音土皇常以春分日乘黃碧石二色  
之雲十二玄龜執神皇九光之策從青帝胡  
老之官飛行甲騎八千人上詣上上禪善无  
量壽天奏地仙得道上學之人言名於四天  
之王

第三壘四音土皇常以立夏之日乘絳霞之  
雲十二鳳凰執五色之節從越老之官飛行  
武騎八千人上詣須延天奏地仙得道上學  
之人言名於四天之王

第四壘四音土皇常以夏至之日乘絳霞雲  
輿十二朱鳥執命魔之幡從越老仙官飛行  
武騎八千人上詣寂然天奏地仙得道上學  
之人言名於四天之王

第五壘四音土皇常以立秋之日乘素雲之

長九

五

輿十二白虎執命靈九元之章從玄老仙官  
飛天雷騎六千人上詣不驕樂天奏地仙得  
道上學之人言名於四天之王

第六壘四音土皇常以秋分之日乘素雲飛  
輿十二白虎執九色制神之幡從玄老仙官

飛天虎騎六千人上詣化應聲天奏地仙得  
道上學之人言名於四天之王

第七壘四音土皇常以立冬之日乘黑雲飛  
輿二十四玄龍執五色命魔靈幡從羗老仙  
官騰天之騎五千人上詣梵寶天奏地仙得  
道上學之人言名於四天之王

第八壘四音土皇常以冬至之日乘黑雲飛  
輿五色飛麟執九色之節從羗老仙官騰天  
之騎五千人上詣梵摩迦夷天奏地仙得道  
上學之人言名於四天之王

第九壘之地極下洞淵洞源綱維天下制使  
不落九壘土皇常以三月一日六月二日九  
月三日十二月四日一年四過乘五色雲輿  
九色飛龍執中元命神之章從僖老仙官耀  
天羽騎萬二千人上詣波梨荅怒天奏九地

學道得仙之人言名於四天之王

右出洞真外國放品經

十方神王儀駕

東方无極飛天神王

南方无極飛天神王

西方无極飛天神王

北方无極飛天神王

東北无極飛天神王

東南无極飛天神王

西南无極飛天神王

西北无極飛天神王

上方无極飛天神王

下方无極飛天神王

右十方至真飛天神王並乘飛雲丹輿綠螯

羽蓋瓊輪參駕朱鳳五色玄龍建九色之節

十絕靈幡前嘯九鳳齊唱後吹八鸞同鳴五  
老啓途群仙翼轅億乘萬騎浮空而行

右出洞玄无量度人經

八才消魔大王儀駕

北臺金玄洞微玉清消魔大王時乘碧霞九

色流靈飛輿紫蓋從桑林千真上昇太虛遊

宴玉清大魔王常乘羽輪之車飛行雲中

東方青帝消魔大王常以春分之日駕乘青

輪羽車飛行雲中遊宴五嶽

南方赤帝消魔大王常以夏至之日駕乘赤



輪羽車飛行雲中遊宴五嶽

西方白帝消魔大王常以立秋之日駕乘白

輪羽車飛行雲中遊宴五嶽

北方黑帝消魔大王常以冬至之日駕乘黑

輪羽車飛行雲中遊宴五嶽

九

七

西北方皓帝消魔大王常以立冬之日駕乘

紫輪羽車飛行雲中遊宴五嶽

東南方昊帝消魔大王常以立夏之日駕乘

黃輪羽車飛行雲中遊宴五嶽

東北方蒼帝消魔大王常以立春之日駕乘

蒼輪羽車飛行雲中遊宴五嶽  
西南方皇帝消魔大王常以秋分之日駕乘  
綠輪羽車飛行雲中遊宴五嶽  
右出洞真金玄羽章玉清隱書  
五嶽帝君儀駕

東嶽太山君常以春分日乘青霞飛輿九色  
蒼龍奏真仙名錄上言高上帝君  
南嶽衡山君常以夏至日乘赤霞飛輪奏真  
仙名錄上言高上帝君  
西嶽華山君常以秋分日乘素霞飛輪奏真

仙名錄上言高上帝君  
北嶽恒山君常以冬至日乘黑霞飛輪奏真  
仙名錄上言高上帝君

中嶽嵩山君常以三月六月九月十二月戊  
辰戊戌己丑己未之日乘黃霞飛輪奏真仙

名錄上言高上帝君

右出洞真九赤斑符五帝內真經

五老君儀駕

東方安寶華林青靈始老號曰蒼帝駕蒼龍

建鵠旗

南方梵寶昌陽丹靈真老號曰赤帝駕丹龍

建朱旗

中央玉寶元靈元老號曰黃帝駕黃龍建黃

旗

西方七寶金門皓靈皇老號曰白帝駕白龍

卷九

建素旗

北方洞陰朔單鬱絕五靈玄老號曰黑帝駕

玄龍建皂旗

右出洞玄元始五老赤書經

五方帝儀駕

東方靈威仰號曰蒼帝其神甲乙服色尚青  
駕蒼龍建鵠旗

南方赤飄弩號曰赤帝其神丙丁服色尚赤  
駕赤龍建朱旗

中央含樞紐號曰黃帝其神戊己服色尚黃

駕黃龍建黃旗

西方耀魄寶號曰白帝其神庚辛服色尚白

駕白龍建素旗

北方隱侯局號曰黑帝其神壬癸服色尚黑

駕黑龍建皂旗

右出洞玄五符經

四海神王儀駕

東海水帝神王常以立春春分之日乘碧輦

飛龍上詣

高皇玉帝削罪簡注仙錄列言上帝之前

此九

南海水帝神王常以立夏夏至之日乘蛟龍

飛行雲輪上詣

高皇玉帝削罪簡注仙錄列奏玉帝之前

西海水帝神王常以立秋秋分之日乘素霞

飛輿上詣

高皇玉帝削罪簡注仙錄列奏玉帝之前  
北海水帝神王常以立冬冬至之日乘黑霞  
飛輿上詣

高皇玉帝削罪簡注玉篇列言上清玉皇帝  
前

右出洞真飛行羽經

無上祕要卷之十九



